



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
DOM NARODA

**Zajednička komisija za odbrambenu i sigurnosnu
politiku i nadzor nad radom odbrambenih i
sigurnosnih struktura na nivou BiH**

Broj: 01,02-011-1837/03

Sarajevo, 05.01.2004. godine

ZAPISNIK

Druge sjednice Zajedničke komisije Parlamentarne skupštine BiH za odbrambenu i sigurnosnu politiku i nadzor nad radom odbrambenih i sigurnosnih struktura na nivou BiH. Sjednica je održana 05.01.2004. godine, u vremenu od 14,00 do 15,00 sati.

Sjednici su prisustvovali članovi Zajedničke komisije: Seada Palavrić, Šefik Džaferović, Adem Huskić, Momčilo Novaković, Vinko Zorić, Osman Brka, Halid Genjac, Boško Šiljegović, Branko Zrno i Anto Spajić.

Sjednici nisu prisustvovali Zoran Spasojević i Mirko Blagojević.

Pored članova, sjednici je prisustvovala Dragica Hinić, stručni saradnik u radnim komisijama Parlamentarne skupštine BiH.

Sjednicom je u odsustvu privremenog predsjedavajućeg, predsjedavao Branko Zrno.

Za raspravu na sjednici predložen je slijedeći

DNEVNI RED:

1. Usvajanje zapisnika 1. konstituirajuće sjednice Zajedničke komisije;
2. Razmatranje Prijedloga zakona o proizvodnji naoružanja i vojne opreme (predlaž: Vijeće Ministara BiH).

Članovi Komisije jednoglasno su usvojili dnevni red.

Ad.1.

Zapisnik 1. konstituirajuće sjednice Zajedničke komisije jednoglasno je usvojen.

Ad.2.

Branko Zrno informirao je o dosadašnjem postupku po Prijedlogu zakona o proizvodnji naoružanja i vojne opreme. Istaknuo je da je dostavljeno mišljenje Ustavno-pravnih komisija oba doma o postojanju ustavno-pravnog osnova i usklađenosti sa pravnim sistemom predmetnog Prijedloga zakona, te da je Momčilo Novaković uložio amandman na Prijedlog zakona.

Potom je vođena rasprava o principima zakona.

Seada Palavrić istaknula je da je neprimjereno korištenje skraćenice «NVO» koja se proteže kroz cijeli zakon, obzirom da ta skraćenica asocira na nevladine organizacije, te da treba koristiti puni naziv «proizvodnja naoružanja i vojne opreme».

Momčilo Novaković imao je suprotno mišljenje navodeći da je ova skraćenica uobičajena u ovoj oblasti i da je ne treba mijenjati.

Nakon ove rasprave članovi Zajedničke komisije jednoglasno su usvojili principe zakona. Potom se pristupilo raspravi o amandmanu Momčila Novakovića uloženom na član 5.stav 1. i 2.

Predlagač amandmana ukratko je izložio razloge ulaganja amandmana, ističući da je osnovna namjera bila omogućiti entitetskim institucijama, organizacijama i privrednim subjektima iz ove oblasti međusobnu saradnju, ne dirajući pri tome isključivu nadležnost institucija BiH u oblasti uvozno-izvoznih poslova.

Nakon njegovog izlaganja u raspravi su učestvovali Vinko Zorić, Seada Palavrić, Šefik Džaferović, Halid Genjac, Adem Huskić i Boško Šiljegović.

Iz rasprave je proistekao prijedlog da se uloženi amandman razdvoji i predloži u formi dva amandmana, tako da bi amandman I. tretirao stav 1. člana 5. , a amandman II stav 2. člana 5. Ovaj prijedlog dat je iz razloga što je većina članova Komisije mišljenja da se stavom 2. člana 5. eliminiraju nejasnoće i poboljšava postojeći tekst, dok su mišljenja o predloženoj izmjeni stava 1. člana 5. bila suprotna. Predlagač amandmana prihvatio je ovaj prijedlog za razdvajanje, tako da su se članovi Komisije potom izjasnili o dva amandmana.

Amandman I., koji se odnosi na stav 1. člana 5. Prijedloga zakona nije usvojen, jer se za usvajanje amandmana izjasnilo 3 člana Komisije, dok je 7 bilo protiv.

Amandman II., koji se odnosi na stav 2. člana 5. usvojen je jednoglasno. Tekst ovog amandmana je slijedeći:

Stav 2. člana 5. mijenja se i glasi:

«Pravne osobe iz člana 4. stav 1. dužne su voditi evidenciju o utrošku «B» materija, utrošku po proizvodima i poluproizvodima, planovima proizvodnje NVO, isporukama i drugim evidencijama koje su bitne za kontrolu proizvodnje NVO.».

Članovi Komisije potom su jednoglasno usvojili Prijedlog zakona sa usvojenim amandmanom, uz konstatiranje da je zakon neophodno donijeti, te predložili domovima Parlamentarne skupštine BiH njegovo usvajanje.

Za izvjestioca pred Predstavničkim domom po ovom izvještaju, jednoglasno je izabran Šefik Džaferović, a pred Domom naroda Branko Zrno. Ovo je usvojeno kao pravilo, tako da će se za izvjestioce pred domovima uvijek izabrati osoba iz rukovodstva Komisije koja pripada pojedinom domu.

Zapisnik sačinila :
Dragica Hinić

Zamjenik predsjedavajućeg
Zajedničke komisije:
Branko Zrno